



Broj: 01-50-1-15-33/16
Sarajevo, 20.7.2016.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

| | | | |
|------------------------|-----------------------|------------|--------------|
| PRIMLJENO: 27-07-2016 | | | |
| Organizaciona jedinica | Klasifikaciona oznaka | Redni broj | Broj priloga |
| | | | |

B.

ZAPISNIK
33. sjednice Predstavničkog doma
Parlamentarne skupštine Bosne i Hercegovine,
održane 19.7.2016.

Sjednica je počela u 10,05 sati. Prisustvovalo je 37 poslanika.

Sjednici nisu prisustvovali poslanici Milica Marković, Miroslav Milovanović, Senad Šepić, Hazim Rančić i Željko Komšić.

Sjednici su prisustvovali predsjedavajući i članovi Vijeća ministara BiH, predstavnici Uprave za indirektno oporezivanje BiH, Centralne harmonizacijske jedinice Ministarstva finansija i trezora BiH i Agencije za zaštitu ličnih podataka u BiH.

Iz međunarodnih organizacija sjednicu su pratili predstavnici OHR-a i EUSR-a, te predstavnici američke i hrvatske ambasade u BiH.

Predsjedavajući Doma Mladen Bosić rekao je da će poslanicima, u skladu s članom 171. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 172. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Saša Magazinović** - predsjedavajućem Vijeća ministara BiH
- **Dušanka Majkić** - ministru pravde BiH
- **Momčilo Novaković** - Vijeću ministara BiH
- **Senad Šepić** - predsjedavajućem Vijeća ministara BiH
- **Damir Arnaut** - ministru vanjskih poslova BiH
- **Predrag Kožul** - predsjedavajućem Vijeća ministara BiH
- **Maja Gasal-Vražalica** - ministru civilnih poslova BiH
- **Denis Bećirović** - ministru sigurnosti BiH
- **Borislav Bojić** - Vijeću ministara BiH / agentici Vijeća ministara BiH pred Evropskim sudom za ljudska prava
- **Borjana Krišto** - ministru vanjske trgovine i ekonomskih odnosa BiH

Ove najave su, u skladu s članom 168. Poslovnika, dostavljene predsjedavajućem Vijeća ministara BiH i onom članu Vijeća ministara BiH na kojeg se pitanje odnosi. Predsjedavajući je podsjetio da je osiguran direktan TV prijenos ovog dijela sjednice, u skladu s članom 171. stav (1) Poslovnika.

Nakon ovih napomena, pristupilo se usmenom postavljanju poslaničkih pitanja i davanju odgovora redoslijedom dostavljanja najava.

Saša Magazinović

Pitanje upućeno predsjedavajućem Vijeća ministara BiH: „Predsjedavajući je u svom ekspozeu, predsjedavajući Vijeća ministara Denis Zvizdić, obećao formiranje Vijeća za nacionalnu sigurnost BiH koje bi činili najviši predstavnici zakonodavne i izvršne vlasti države i entiteta, čelnici obavještajne i najvažnijih policijskih agencija. Konkretno pitanje je – Dokle se došlo s tim, budući da je on obećao i izradu dokumenta sigurnosne politike 2015.–2025. godina?“¹

- Predsjedavajući Vijeća ministara BiH Denis Zvizdić nije prisustvovao ovom dijelu sjednice, pa je poslanik Saša Magazinović zatražio odgovor u pismenoj formi.

Dušanka Majkić

Pitanje upućeno ministru pravde BiH: „Dakle, zaista ne bih željela s obzirom da se radi o pitanju vezano za napade na srpske osuđenike u Kazneno-popravnog zavodu Zenica do, iz dana u dan evo događaju se, novi događaji nas sustižu s tim problemom, i s obzirom na neko njegovo mišljenje, iako nije njegova striktna nadležnost, ali je sugestija ombudsmena da on preuzme ulogu koordinatora u tom procesu da se konačno omogući da osuđenici žive, borave u zatvorima u mjestima koja su najbliža njihovoj kući. S obzirom da Ministarstvo pravde Federacije opstruiše taj stav, zanimljivo bi bilo čuti šta je ministar pravde na tom planu uradio?“²

- Ministar pravde BiH Josip Grubeša nije prisustvovao ovom dijelu sjednice, pa je poslanica Dušanka Majkić rekla da će pitanje ponoviti na narednoj sjednici na kojoj bude predviđeno postavljanje poslaničkih pitanja u usmenoj formi.

Momčilo Novaković

Pitanje upućeno Vijeću ministara BiH: „Direktor Instituta za mjeriteljstvo BiH je samovoljno donio Naredbu o mjerilima u zakonskom mjeriteljstvu i rokovima verifikacije u kojoj je, između ostalog, i „piplmetar“ proglasio kao mjerilo zakonskog mjeriteljstva. Na osnovu ove naredbe, slijedi nezakonito imenovanje „Audinece Measurement“ d.o.o. Sarajevo, laboratorij za verifikaciju mjerila „piplmetar“. Da li je Vijeće ministara konsultirano prilikom donošenja navedene naredbe? U kojim još zemljama je „piplmetar“ mjerilo koje spada u zakonsko mjeriteljstvo? Čiju saglasnost je imao direktor kada je imenovao spomenuti laboratorij?“

- Odgovor na pitanje dao je ministar vanjske trgovine i ekonomskih odnosa BiH Mirko Šarović. Poslanik Momčilo Novaković rekao je da će odgovor komentirati kada ga dobije u pisanoj formi.

Poslanik **Senad Šepić** odsustvovao je sa sjednice.

Damir Arnaut

Pitanje upućeno ministru vanjskih poslova BiH: „Zbog čega, te na osnovu kog propisa, ministar vanjskih poslova BiH kontinuirano odbija dostaviti odgovore na poslanička pitanja koja sam postavio u sklopu 23. sjednice Predstavničkog doma (akt broj: 01-50-1-15-23/16, od

¹ Izvod iz neautoriziranog transkripta 34. sjednice Predstavničkog doma Parlamentarne skupštine BiH

² Izvod iz neautoriziranog transkripta 34. sjednice Predstavničkog doma Parlamentarne skupštine BiH

5.1.2016.), te ponovio kroz dopunska poslanička pitanja (akt broj: 01-50-1-15-26/16, od 7.3.2016.)?

- **Ministar vanjskih poslova BiH Igor Crnadak nije prisustvovao sjednici. Predsjedavajući Doma rekao je da će Ministarstvu vanjskih poslova BiH uputiti dopis kojim će nadležne podsjetiti na obavezu dostavljanja odgovora na poslanička pitanja, u skladu s članom 171. Poslovnika Predstavničkog doma PSBiH. Poslanik Damir Arnaut zatražio je i pismeni i usmeni odgovor na ovo pitanje.**

Predrag Kožul

Pitanje upućeno predsjedavajućem Vijeća ministara BiH: „Molim Vas da nam u Predstavničkom domu Parlamentarne skupštine BiH obrazložite zašto nema Vašeg potpisa na pismu namjere upućenom MMF-u, a koje je usaglašeno i usvojeno na Fiskalnom vijeću?

- **Predsjedavajući Vijeća ministara BiH Denis Zvizdić nije prisustvovao ovom dijelu sjednice, pa je poslanik Predrag Kožul zatražio odgovor u pismenoj formi.**

Maja Gasal-Vražalica

Pitanje upućeno ministru civilnih poslova BiH: „Šta ste Vi kao ministar koji rukovodi Konferencijom ministara/ica obrazovanja preduzeli kako ne bi došlo do podjele učenika/ica u Jajcu?“

- **Odgovor na pitanje dao je ministar civilnih poslova BiH Adil Osmanović. Poslanica Maja Gasal-Vražalica zatražila je odgovor u pisanoj formi.**

Denis Bećirović

Pitanje upućeno ministru sigurnosti BiH: „Uvaženi ministre, ovo je Dejtonski mirovni sporazum, u njemu piše da su odluke Ustavnog suda konačne i obavezujuće, ponavljam konačne i obavezujuće. O odlukama Ustavnog suda se ne može ni raspravljati, a kamo li sazivati nelegalni, neustavni, antidejtonski referendum. Eventualno održavanje takvog referenduma u entitetu RS je ne samo rušenje Ustavnog suda BiH već i rušenje ustavnog poretka ove države. Dakle, 25. septembra, ako se dogodi taj referendum, srušena je suština Dejtonskog mirovnog sporazuma i toga moramo biti svjesni. Za početak, danas je vrlo važno da iz ovog parlamenta ode poruka ko unilateralno želi da napusti Dejtonski mirovni sporazum. To moramo markirati zbog eventualnog neželjenog razvoja situacije, to se mora vrlo jasno i glasno danas podvući. Ministre, ulazak u referendumske avanture koje se tiču cijele države Bosne i Hercegovine i svih njenih građana i naroda ne može nikada završiti samo jednim referendumom. U Bosni i Hercegovini je ugrožen mir i mirovni proces i mi treba da razmišljamo o budućnosti i srpske, i hrvatske, i bošnjačke, i sve druge djece u ovoj zemlji. Kakve su Vaše procjene sigurnosne situacije, ko će 25.9. i nakon toga i kako očuvati mir i sigurnost u ovoj zemlji, ko će garantovati građanima slobodu i kojim mehanizmima?“³

- **Ministar sigurnosti BiH Dragan Mektić rekao je da će odgovor dostaviti u pisanoj formi. Poslanik Denis Bećirović kratko je komentirao.**

³ Izvod iz neautoriziranog transkripta 34. sjednice Predstavničkog doma Parlamentarne skupštine BiH

Borislav Bojić

Pitanje upućeno Vijeću ministara BiH / agentici Vijeća ministara BiH pred Evropskim sudom za ljudska prava: „Koje korake su do sada preduzeli potpisnici Sporazuma o implementaciji generalnih mjera iz presuda Hadžić i Suljić protiv Bosne i Hercegovine, a u vezi sa saradnjom entiteta i države Bosne i Hercegovine, na ispunjenju međunarodnih obaveza, te da li pred Evropskim sudom u Strazburu ima novih sličnih aplikacija?“

- Odgovor na pitanje dala je ministrica za ljudska prava BiH Semiha Borovac. Poslanik Borislav Bojić zatražio je odgovor u pisanoj formi.

Borjana Krišto

Pitanje upućeno ministru vanjske trgovine i ekonomskih odnosa BiH: „Članom 35. Zakona o duhanu („Službeni glasnik BiH“, broj 32/10), između ostalog, propisano je da laboratorij za analizu duhana i duhanskih proizvoda vrši potrebna ispitivanja kvaliteta duhanskih proizvoda na tržištu BiH proizvedenih izvan teritorije BiH. Iz kojih razloga Ministarstvo vanjske trgovine i ekonomskih odnosa BiH nije dalo odobrenje, tj. odredilo laboratorije koje bi vršile analizu i super analizu duhanskih prerađevina, te zašto ministar nije propisao uslove za primjenu člana 18. stav (4) Pravilnika o razvrstavanju cigareta i maraka („Službeni glasnik BiH“, broj 62/13), kojim bi se utvrdili uslovi koje moraju ispunjavati laboratorije za analizu i utvrđivanje fizičkih i hemijskih svojstava duhana i duhanskih proizvoda?“

- Odgovor na pitanje dao je ministar vanjske trgovine i ekonomskih odnosa BiH Mirko Šarović. Poslanica Borjana Krišto izrazila je zadovoljstvo datim odgovorom i zatražila dostavljanje i u pisanoj formi.

Prije prelaska na utvrđivanje dnevnog reda, u okviru prethodnih pitanja, predsjedavajući je upoznao poslanike da je Kolegij Doma, radeći kao komisija, postigao saglasnost o Izvještaju o radu Ureda za razmatranje žalbi za 2015. godinu, čime je, u skladu s članom 86. stav (2) Poslovnika Predstavničkog doma, Izvještaj **usvojen**. Komisija za finansije i budžet u svom mišljenju predložila je usvajanje zaključka 1. iz mišljenja. Predsjedavajući je prijedlog zaključka dao na glasanje.

Zaključak je **usvojen** s 21 glasom „za“ (iz Federacije BiH 15, iz Republike Srpske šest), četiri „protiv“ i 11 glasova „suzdržan“, a on glasi: „*Predstavnički dom Parlamentarne skupštine BiH zadužuje Vijeće ministara BiH da razmotri mjere koje će omogućiti adekvatnu organizacionu strukturu Ureda za razmatranje žalbi i osigurati rad Ureda u punom kapacitetu na način da se osiguraju dodatna finansijska sredstva za zapošljavanje u Uredu, a u skladu s prioritetima i zahtjevom Ureda za razmatranje žalbi prema Vijeću ministara BiH.*“

U vezi sa izmjenama i dopunama dnevnog reda sjednice, predsjedavajući je napomenuo sljedeće:

Na dnevni red dodate su:

Tačka 4. Zahtjev Vijeća ministara BiH za razmatranje Prijedloga zakona o izmjenama i dopunama Zakona o akcizama u Bosni i Hercegovini po hitnom postupku, zakon broj: 01,02-02-1-1853/16, od 7.7.2016.,

Tačka 5. Zahtjev Vijeća ministara BiH za razmatranje Prijedloga zakona o izmjeni Zakona o sistemu indirektnog oporezivanja u Bosni i Hercegovini po hitnom postupku, zakon broj: 01,02-02-1-1854/16, od 7.7.2016.,

Tačka 6. Zahtjev Vijeća ministara BiH za razmatranje Prijedloga zakona o izmjenama i dopuni Zakona o uplatama na jedinstveni račun i raspodjeli prihoda po hitnom postupku, zakon broj: 01,02-02-1-1855/16, od 7.7.2016.,

Tačka 7. Zahtjev poslanika Borislava Bojića, Nermine Kapetanović, Lazara Prodanovića, Maje Gasal-Vražalice, Damira Arnauta i Saše Magazinovića za razmatranje Prijedloga dopuna Poslovnika Predstavničkog doma Parlamentarne skupštine BiH po hitnom postupku, u skladu s članom 133. Poslovnika, broj: 01-02-1-1788/16, od 28.6.2016.,

Tačka 18. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama i dopunama Zakona o zabrani diskriminacije (predlagač: Vijeće ministara BiH, zakon broj: 01,02-02-1-341/15, od 4.3.2016.) i

Tačka 19. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama i dopunama Zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu (predlagač: Vijeće ministara BiH, zakon broj: 01,02-02-1-34/15, od 1.3.2016.).

Dopunjena je **tačka 9.** koja sada glasi: **Izjašnjavanje Predstavničkog doma o utvrđivanju novog roka za dostavljanje Izvještaja o Prijedlogu zakona o dopunama Zakona o parničnom postupku pred Sudom BiH**, predlagač: Vijeće ministara BiH, zakon broj: 01,02-02-1-609/16, od 18.3.2016.

Nakon ovih napomena, predsjedavajući je otvorio raspravu o dnevnom redu sjednice.

U raspravi su učestvovali: Sadik Ahmetović, Denis Bećirović, Damir Bećirović, Aleksandra Pandurević, Saša Magazinović i Dušanka Majkić.

Sadik Ahmetović predložio je dopunu dnevnog reda tačkom koja glasi: Inicijativa za smjenu ministra vanjskih poslova BiH Igora Crnatka. Predsjedavajući je rekao da će prijedlog biti tretiran u skladu s Poslovníkom Predstavničkog doma PSBiH

Denis Bećirović predložio je dopunu dnevnog reda tačkom koja glasi: Informacija Vijeća ministara BiH o ustavnopravnim, političkim i sigurnosnim implikacijama i posljedicama najavljenog organiziranja antidejtonskog i antiustavnog referenduma u bosanskohercegovačkom entitetu RS o konačnim i obavezujućim odlukama Ustavnog suda države Bosne i Hercegovine. Predsjedavajući je dao na glasanje ovaj prijedlog. „Za“ je glasalo 20 poslanika (iz Federacije BiH 19, iz Republike Srpske jedan), 14 je bilo „protiv“ i dva „suzdržana“. Predsjedavajući je konstatirao da nema potrebne entitetske većine. Kolegij kao komisija nije postigao saglasnost. U drugom krugu glasanja prijedlog za dopunu dnevnog

reda **nije usvojen**. „Za“ je glasalo 20 poslanika, 14 je bilo „protiv“ (iz Federacije BiH četiri, iz Republike Srpske deset) i dva „suzdržana“.

Damir Bećirović predložio je dopunu dnevnog reda tačkom koja glasi: Rasprava o pismu namjere Međunarodnom monetarnom fondu. Predsjedavajući je dao na glasanje ovaj prijedlog. Prijedlog za dopunu dnevnog reda **usvojen je** s 22 glasa „za“ (iz Federacije BiH 15, iz Republike Srpske sedam), 11 „protiv“ i tri glasa „suzdržan“.

Aleksandra Pandurević predložila je dopunu dnevnog reda tačkom koja glasi: Zaključak o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine. Prijedlog za dopunu dnevnog reda **usvojen je** s 27 glasova „za“ (iz Federacije BiH 19, iz Republike Srpske osam), tri „protiv“ i šest glasova „suzdržan“.

Duškanka Majkić predložila je da se tačke 4., 5. i 6. skinu s dnevnog reda sjednice. Predsjedavajući je rekao da se tačke ne mogu skidati jer su obavezne tačke dnevnog reda i u skladu sa zahtjevom predlagača.

Nakon rasprave, predsjedavajući je konstatirao da 33. sjednica Predstavničkog doma ima sljedeći

DNEVNI RED

1. Usvajanje Zapisnika 32. sjednice Predstavničkog doma Parlamentarne skupštine BiH;
2. Usvajanje zapisnika 5. i 6. hitne sjednice Predstavničkog doma Parlamentarne skupštine BiH;
3. Komentari na dobivene odgovore na poslanička pitanja;
4. Zahtjev Vijeća ministara BiH za razmatranje Prijedloga zakona o izmjenama i dopunama Zakona o akcizama u Bosni i Hercegovini, po hitnom postupku, zakon broj: 01,02-02-1-1853/16, od 7.7.2016.;
5. Zahtjev Vijeća ministara BiH za razmatranje Prijedloga zakona o izmjeni Zakona o sistemu indirektnog oporezivanja u Bosni i Hercegovini po hitnom postupku, zakon broj: 01,02-02-1-1854/16, od 7.7.2016.;
6. Zahtjev Vijeća ministara BiH za razmatranje Prijedloga zakona o izmjenama i dopuni Zakona o uplatama na jedinstveni račun i raspodjeli prihoda po hitnom postupku, zakon broj: 01,02-02-1-1855/16, od 7.7.2016.;
7. Zahtjev poslanika Borislava Bojića, Nermine Kapetanović, Lazara Prodanovića, Maje Gasal-Vražalice, Damira Arnauta i Saše Magazinovića za razmatranje Prijedloga dopuna Poslovnika Predstavničkog doma Parlamentarne skupštine BiH po hitnom postupku, u skladu s članom 133. Poslovnika, broj: 01-02-1-1788/16, od 28.6.2016.;
8. Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine, predlagači: poslanici Amir Fazlić i Mirsad Donlagić, zakon broj: 01-02-1-1417/16, od 13.5.2016. (drugo čitanje);
9. Izjašnjavanje Predstavničkog doma o utvrđivanju novog roka za dostavljanje Izvještaja o Prijedlogu zakona o dopunama Zakona o parničnom postupku pred Sudom BiH, predlagač: Vijeće ministara BiH, zakon broj: 01,02-02-1-609/16, od 18.3.2016.;

10. Prijedlog zakona o volonterskim aktivnostima koje organiziraju udruženja i fondacije, crkve i vjerske zajednice i institucije Bosne i Hercegovine, predlagač: Vijeće ministara BiH, zakon broj: 01,02-02-1-1187/16, od 27.6.2016. (prvo čitanje);
11. Izvještaj o zaštiti ličnih podataka u Bosni i Hercegovini za 2015. godinu, podnosilac: Agencija za zaštitu ličnih podataka u Bosni i Hercegovini, akt broj: 01,02-37-1581/16, od 1.6.2016.;
12. Godišnji konsolidirani izvještaj o sistemu finansijskog upravljanja i kontrole za 2015. godinu, podnosilac: Ministarstvo finansija i tezora BiH, broj: 01,02,03-16-1-1478/16, od 18.5.2016.;
13. Informacija o stanju iseljeništva, podnosilac: Ministarstvo za ljudska prava i izbjeglice BiH, akt broj: 01,02-42-1590/16, od 2.6.2016.;
14. Informacija o provođenju Okvirnog sporazuma između Razvojne banke Vijeća Evrope i Bosne i Hercegovine u vezi s Regionalnim programom za stambeno zbrinjavanje s obrazloženjem, podnosilac: Ministarstvo za ljudska prava i izbjeglice BiH, akt broj: 01,02,03-21-1560/16, od 27.5.2016.;
15. Informacija o stanju i pojavama vršnjačkog nasilja i nasilja među djecom u Bosni i Hercegovini, podnosilac: Ministarstvo za ljudska prava i izbjeglice BiH, akt broj: 01-37-1743/16, od 22.6.2016. (realizacija poslaničke inicijative i zaključaka usvojenih na 24. sjednici, održanoj 3.2.2016.);
16. Informacija o raspodjeli i korištenju sredstava tekuće budžetske rezerve za period I. – XII. 2015. godine, podnosilac: Ministarstvo finansija i trezora BiH, akt broj: 01,02,03/03/14-16-1-1745/16, od 22.6.2016.;
17. Razmatranje poslaničke inicijative Denisa Bećirovića, podnesene 15.6.2016., koja glasi: *„Zadužuje se Vijeće ministara BiH da, najkasnije u roku od 90 dana od dana usvajanja ove inicijative u Predstavničkom domu Parlamentarne skupštine BiH, sačini i u parlamentarnu proceduru dostavi izvještaj o primjeni Sporazuma o osnivanju javnih korporacija Bosne i Hercegovine (Aneks 9. Dejtonskog mirovnog sporazuma), s prijedlogom akcionog plana za primjenu navedenog sporazuma.“*, akt broj: 01-50-1-1694/16;
18. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama i dopunama Zakona o zabrani diskriminacije (predlagač: Vijeće ministara BiH, zakon broj: 01,02-02-1-341/15, od 4.3.2016.);
19. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama i dopunama Zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu (predlagač: Vijeće ministara BiH, zakon broj: 01,02-02-1-34/15, od 1.3.2016.);
20. Rasprava o pismu namjere Međunarodnom monetarnom fondu, predlagač tačke: poslanik Damir Bećirović, materijal broj: 01-50-1-1956/16, od 19.7.2016.;
21. Zaključak o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine, predlagač: poslanica Aleksandra Pandurević, akt broj: 01-34-1-1959/16, od 19.7.2016.;
22. Davanje saglasnosti za ratifikaciju Sporazuma o zajmu između Bosne i Hercegovine i OPEC-ovog Fonda za međunarodni razvoj (OFID) – Projekat razvoja ruralnog preduzetništva, akt broj: 01,02-05-2-1763/16, od 23.6.2016.;
23. Davanje saglasnosti za ratifikaciju Ugovora o grantu (Projekat vodosnabdijevanja Gradačac) između Bosne i Hercegovine i JP „Komunalac“ d.d. Gradačac i Evropske banke za obnovu i razvoj, akt broj: 01,02-05-2-1770/16, od 24.6.2016.;
24. Davanje saglasnosti za ratifikaciju Sporazuma o grantu između Razvojne banke Vijeća Evrope i Bosne i Hercegovine u vezi s Regionalnim stambenim programom – BiH4 (2015.), akt broj: 01,02-05-2-1826/16, od 4.7.2016.

* * * * *

Ad.1. Usvajanje Zapisnika 32. sjednice Predstavničkog doma Parlamentarne skupštine BiH

Nakon uvodnih napomena predsjedavajućeg, Nikola Lovrinović istakao je primjedu na Zapisnik..

Zapisnik 32. sjednice usvojen je s 35 glasova „za“ (iz Federacije BiH 25, iz Republike Srpske deset), bez glasova „protiv“ i dva glasa „suzdržan“, s primjedbom poslanika Nikole Lovrinovića.

Ad.2. Usvajanje zapisnika 5. i 6. hitne sjednice Predstavničkog doma Parlamentarne skupštine BiH

Zapisnici 5. i 6. hitne sjednice usvojeni su s 35 glasova „za“ (iz Federacije BiH 25, iz Republike Srpske deset), bez glasova „protiv“ i dva glasa „suzdržan“.

Ad.3. Komentari na dobivene odgovore na poslanička pitanja

Predsjedavajući je podsjetio da su, u skladu s članom 170. Poslovnika, do ove sjednice Doma pitanja u pisanoj formi postavili poslanici:

- **Damir Arnaut** – postavio 12 pitanja Ministarstvu vanjske trgovine i ekonomskih odnosa BiH
- **Maja Gasal-Vražalica** uputila inicijativu Kolegiju Predstavničkog doma
- **Dužanka Majkić** – postavila pitanje predsjedavajućem Vijeća ministara BiH.

Sadržaj postavljenih pitanja i inicijativa je sljedeći:

Damir Arnaut

Pitanja postavljena Ministarstvu vanjske trgovine i ekonomskih odnosa BiH:

1. „Koje mjere je preduzeo MVTEOBiH, a potom Ured za veterinarstvo BiH, po pitanju praćenja i prevencije prekograničnog širenja bolesti na našu zemlju? Da li Ured za veterinarstvo ima pripremljen plan djelovanja u slučaju pojave ove bolesti u BiH?
2. Na koji način se vrši kontrola i sprečavanje ilegalne trgovine živim životinjama u BiH?
3. Poznato je da je praksa zemalja članica EU tzv. *stamping out* metoda, odnosno uništavanje svih oboljelih životinja. Da li se u BiH, u skladu s važećim zakonodavstvom, primjenjuju iste mjere kao u EU i ako primjenjuju, koje konkretne mjere je preduzeo MVTEO (osnivanje fondova za saniranje štete domaćih stočara...)?

4. Da li BiH raspolaže potrebnim vakcinama i šta je MVTEO preduzeo po tom pitanju? Da li je utvrđen program vakcinacije koji bi se primjenjivao i da li je naručen određeni kontingent vakcina u slučaju izbijanja bolesti i situacije u kojoj je potrebno hitno djelovati?
5. Kako će se ekonomska šteta, nastala eventualnim izbijanjem bolesti, odraziti na male proizvođače kojih je najviše u BiH, te na njihove porodice kojima je u mnogim slučajevima to jedini izvor prihoda?
6. Kako će se eventualno izbijanje bolesti odraziti na izvoz mlijeka i mliječnih proizvoda iz BiH u zemlje EU, uzimajući u obzir da EU zabranjuje uvoz kako živih životinja tako i proizvoda od tih životinja u slučaju izbijanja bolesti kvrgave kože?
7. Da li bi izbijanje bolesti u našoj zemlji uticalo na projekat izvoza goveđeg mesa u Republiku Tursku?
8. Da li je veterinarski servis u BiH dovoljno spreman za adekvatan odgovor u slučaju izbijanja ovog oboljenja u BiH? Da li su veterinari obučeni u smislu mjera koje treba preduzimati, te da li stočari imaju saznanja o opasnosti od prekograničnog širenja bolesti iz susjednih zemalja, kao i da li su obučeni prepoznati bolest i jesu li obavezni prijaviti sumnju nadležnoj veterinarskoj službi? Da li su stočari upoznati s ekonomskom štetom koju može prouzrokovati izbijanje bolesti u njihovim stadima?
9. Da li se vakcinisane životinje i proizvodi od tih životinja namijenjeni ishrani ljudi mogu smatrati sigurnima ili i oni podliježu mjerama zabrane izvoza u zemlje EU i druge zemlje koje primjenjuju iste mjere zabrane uvoza? Koliko dugo nakon vakcinacije se životinje mogu smatrati zdravima i proizvodi od njih sigurnima za ljudsku konzumaciju? Da li se vakcinacija provodi jednom godišnje i koliko dugo?
10. Da li u BiH postoje laboratorije u kojima je moguća identifikacija uzročnika i ukoliko ne postoje, šta je MVTEO preduzeo po tom pitanju? Da li su osigurana sredstva za vršenje potrebnih analiza?
11. Na koji način bi se vršilo neškodljivo uklanjanje leševa usmrćenih oboljelih životinja? Da li postoje adekvatni kapaciteti u BiH, tj. adekvatne spalionice za krupnu stoku koje ne ugrožavaju okoliš?
12. Da li je BiH spremna adekvatno odgovoriti izazovu prekograničnog širenja ove bolesti?“

Maja Gasal-Vražalica

Inicijativa upućena Kolegiju Predstavničkog doma PSBiH:

„Zadužuje se Vijeće ministara BiH da, najkasnije u roku od 60 dana od dana usvajanja ove inicijative u Predstavničkom domu Parlamentarne skupštine BiH, sačini i u parlamentarnu proceduru dostavi izvještaj o mladima u Bosni i Hercegovini.“

Dužanka Majkić

Pitanje postavljeno predsjedavajućem Vijeća ministara BiH: „Da li je i kada Upravni odbor Agencije za osiguranje u BiH usvojio Godišnji izvještaj Agencije za 2015. godinu?“

Predsjedavajući je rekao da su do današnje sjednice dostavljeni sljedeći odgovori na poslanička pitanja:

- Na pitanja **Senada Šepića**, postavljena u pisanoj formi na 29., 30. i 31. sjednici, odgovore dostavilo Vijeće ministara BiH

- Na pitanje **Mirsada Donlagića**, postavljeno u usmenoj formi na 29. sjednici i na pitanje postavljeno u pisanoj formi na 30. sjednici, odgovore dostavilo Vijeće ministara BiH, te na pitanja postavljena u pisanoj formi na 31. sjednici Vlada Federacije BiH prosljedila odgovore Federalnog fonda za pomoć nastradalim područjima od prirodne nesreće na teritoriji FBiH, Federalnog ministarstva prostornog uređenja i Federalne uprave civilne zaštite
- Na pitanje **Damira Arnauta**, postavljeno u pisanoj formi na 29. sjednici i na pitanje postavljeno u usmenoj formi na 31. sjednici, odgovore dostavilo Vijeće ministara BiH
- Na pitanje **Nikole Lovrinovića**, postavljeno u pisanoj formi na 27. sjednici, odgovor dostavilo Vijeće ministara BiH
- Na pitanje **Salka Sokolovića**, postavljeno u pisanoj formi na 32. sjednici, Vijeće ministara BiH prosljedilo odgovor Ureda za zakonodavstvo Vijeća ministara BiH i na isto pitanje odgovor dostavio Kolegij Sekretarijata Parlamentarne skupštine BiH
- Na pitanje **Šefika Džaferovića**, postavljeno u usmenoj formi na 31. sjednici, odgovor dostavilo Ministarstvo vanjske trgovine i ekonomskih odnosa BiH
- Na pitanje **Safera Demirovića**, postavljeno u usmenoj formi na 31. sjednici, odgovor dostavilo Ministarstvo vanjske trgovine i ekonomskih odnosa BiH.

Dostavljene odgovore komentirali su poslanici Maja Gasal-Vražalica i Nikola Lovrinović.

Maja Gasal-Vražalica izrazila je nezadovoljstvo nedobivanjem odgovora od predsjedavajućeg Vijeća ministara BiH na pitanje koje je postavila u usmenoj formi na 27. sjednici Doma, održanoj 5.4.2016., i na koje je zatražen odgovor u pisanoj formi.

Nikola Lovrinović kratko je komentirao odgovor dobiven od Ministarstva za ljudska prava i izbjeglice BiH, te je rekao da će detaljnije komentirati odgovor na pitanje o slučaju gđe. Filipović kada dobije detaljniji odgovor. Također je izrazio nezadovoljstvo nedobivanjem odgovora od RTVFBiH i Tužilaštva BiH od kojeg nije dobio odgovor na više postavljenih pitanja.

Prije prelaska na sljedeću tačku dnevnog reda, predsjedavajući je dao na glasanje prijedlog da se objedini rasprava o tačkama 4., 5. i 6. Prijedlog je **usvojen** s 21 glasom „za“ (iz Federacije BiH 16, iz Republike Srpske pet), šest „protiv“ i devet glasova „suzdržan“.

Ad.4. Zahtjev Vijeća ministara BiH za razmatranje Prijedloga zakona o izmjenama i dopunama Zakona o akcizama u Bosni i Hercegovini po hitnom postupku, zakon broj: 01,02-02-1-1853/16, od 7.7.2016.

Ad.5. Zahtjev Vijeća ministara BiH za razmatranje Prijedloga zakona o izmjeni Zakona o sistemu indirektnog oporezivanja u Bosni i Hercegovini po hitnom postupku, zakon broj: 01,02-02-1-1854/16, od 7.7.2016.

Ad.6. Zahtjev Vijeća ministara BiH za razmatranje Prijedloga zakona o izmjenama i dopuni Zakona o uplatama na jedinstveni račun i raspodjeli prihoda po hitnom postupku, zakon broj: 01,02-02-1-1855/16, od 7.7.2016.

Predsjedavajući je dao uvodne napomene i otvorio raspravu o proceduri.

U raspravi su učestvovali: Šemsudin Mehmedović, Nikola Lovrinović, Predrag Kožul, Mirsad Donlagić, Damir Bećirović, Damir Arnaut, Staša Košarac, Aleksandra Pandurević, Dušanka Majkić, Zaim Backović, Salko Sokolović, Mensura Beganović, Maja Gasl – Vražalica, Šefik Džaferović i Saša Magazinović.

Domu su se obratili predsjedavajući Vijeća ministara BiH Denis Zvizdić i direktor Uprave za indirektno oporezivanje BiH Miro Džakula.

Nakon rasprave, predsjedavajući je predložio da se objedini glasanje o proceduri za ova tri prijedloga zakona. Prijedlog je **usvojen** s 29 glasova „za“ (iz Federacije BiH 19, iz Republike Srpske deset), bez glasova „protiv“ i pet glasova „suzdržan“.

Zatim se pristupilo glasanju o Zahtjevu za hitni postupak. „Za“ je glasalo 12 poslanika (iz Federacije BiH), 16 „protiv“ i šest poslanika bilo je „suzdržano“. Predsjedavajući je konstatirao da Zahtjev za hitni postupak **nije usvojen**.

Prešlo se na glasanje o skraćenoj proceduri. „Za“ je glasalo 18 poslanika (iz Federacije BiH 13, iz Republike Srpske pet), devet „protiv“ i sedam poslanika bilo je „suzdržano“. Predsjedavajući je konstatirao da će se Prijedlog zakona o izmjenama i dopunama Zakona o akcizama u Bosni i Hercegovini, Prijedlog zakona o izmjeni Zakona o sistemu indirektnog oporezivanja u Bosni i Hercegovini i Prijedlog zakona o izmjenama i dopuni Zakona o uplatama na jedinstveni račun i raspodjeli prihoda, razmatrati u skladu s odredbama kojima se regulira skraćeni zakonodavni postupak.

Ad.7. Zahtjev poslanika Borislava Bojića, Nermine Kapetanović, Lazara Prodanovića, Maje Gasal-Vražalice, Damira Arnauta i Saše Magazinovića za razmatranje Prijedloga dopuna Poslovnika Predstavničkog doma Parlamentarne skupštine BiH po hitnom postupku, u skladu s članom 133. Poslovnika, broj: 01-02-1-1788/16, od 28.6.2016.

Predsjedavajući je dao uvodne napomene. Između ostalog, rekao je da je Kolegij Doma na svojoj jučerašnjoj sjednici odlučio Domu predložiti usvajanje sljedećeg zaključka:

„Predstavnički dom Parlamentarne skupštine BiH pokreće inicijativu o osnivanju Privremene zajedničke komisije oba doma Parlamentarne skupštine BiH za izradu Prijedloga izmjena i dopuna Poslovnika Predstavničkog doma i Doma naroda Parlamentarne skupštine BiH, koja bi razmotrila dosadašnju primjenu oba poslovnika, sve prijedloge i sugestije za izmjene i dopune, te domovima Parlamentarne skupštine BiH predložila izmjene i dopune poslovnika oba doma Parlamentarne skupštine BiH. Svi prijedlozi izmjena i dopuna poslovnika koji su u proceduri bit će dostavljeni Privremenoj zajedničkoj komisiji oba doma Parlamentarne skupštine BiH na razmatranje.“

Diskutirao je Saša Magazinović.

Zaključak Kolegija Predstavničkog doma **usvojen** je s 34 glasa „za“ (iz Federacije BiH 24, iz Republike Srpske deset), jednim „protiv“ i dva glasa „suzdržan“.

O Zahtjevu za razmatranje Prijedloga dopuna Poslovnika Predstavničkog doma Parlamentarne skupštine BiH po hitnom postupku nije se glasalo.

Ad.8. Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine, predlažaći: poslanici Amir Fazlić i Mirsad Donlagić, zakon broj: 01-02-1-1417/16, od 13.5.2016. (drugo čitanje)

Predsjedavajući je dao uvodne napomene i otvorio raspravu.

U raspravi su učestvovali: Mirsad Mešić, Nikola Lovrinović, Fehim Škaljić, Predrag Kožul, Momčilo Novaković, Dušanka Majkić, Aleksandra Pandurević, Staša Košarac, Šefik Džaferović, Amir Fazlić i Damir Arnaut.

Amandmane u plenarnoj fazi podnijeli su Nikola Lovrinović i Staša Košarac.

Nakon rasprave, predsjedavajući je dao na glasanje predložene amandmane.

Amandman poslanika Nikole Lovrinovića **nije usvojen**. „Za“ je glasalo pet poslanika (iz Federacije BiH), 27 „protiv“ i pet poslanika bilo je „suzdržano“. Amandman glasi:

Amandman I.

Član 3. Prijedloga mijenja se i glasi:

„Iza člana 16. dodaje se novi član 16a. koji glasi:

„Član 16a.

(Finansiranje javnih RTV servisa)

- (1) Javni RTV servis na teritoriji Bosne i Hercegovine primarno će se finansirati prihodima od RTV taksi.
- (2) Naplatu RTV taksi obavljat će posebna agencija čije će utemeljenje i rad biti regulirani posebnim zakonom koji će donijeti Parlamentarna skupština BiH.“

Amandman poslanika Staše Košarca **nije usvojen**. „Za“ su glasala četiri poslanika (iz Republike Srpske), 14 „protiv“ i 19 poslanika bilo je „suzdržano“. Amandman glasi:

Amandman I.

U članu 6. Prijedloga zakona o izmjenama i dopunama Zakona o Javnom radiotelevizijskom sistemu BiH, koji se odnosi na član 23. Zakona, stav (2) mijenja se i glasi:

„(2) Neto prihod od marketinškog oglašavanja pripada onom javnom radiotelevizijskom servisu koji je taj prihod ostvario.“

Stav (4) mijenja se i glasi: „(4) Prihod od RTV takse ravnopravno se dijeli na tri javna radiotelevizijska servisa i odmah raspodjeljuje u omjeru 33,33% BHRT-u, 33,33% RTRS-u i 33,33% RTVFBiH.

Prešlo se na glasanje o Prijedlogu zakona. S 21 glasom „za“ (iz Federacije BiH 19, iz Republike Srpske dva), 15 glasova „protiv“ i jednim glasom „suzdržan“, Prijedlog zakona nije dobio potrebnu entitetsku većinu. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 21 glasom „za“, 16 „protiv“ (iz Federacije BiH pet, iz Republike Srpske 11) i bez glasova „suzdržan“, Prijedlog zakona o izmjenama i dopunama Zakona o Javnom radiotelevizijskom sistemu Bosne i Hercegovine **nije usvojen** u drugom čitanju.

Ad.9. Izjašnjavanje Predstavničkog doma o utvrđivanju novog roka za dostavljanje izvještaja o Prijedlogu zakona o dopunama Zakona o parničnom postupku pred Sudom BiH, predlagač: Vijeće ministara BiH, zakon broj: 01,02-02-1-609/16, od 18.3.2016.

Nakon uvodnih napomena predsjedavajućeg, otvorena je rasprava. Nije bilo prijavljenih.

Dom je, s 25 glasova „za“ (iz Federacije BiH 18, iz Republike Srpske sedam), četiri glasa „protiv“ i osam glasova „suzdržan“, utvrdio produženje roka Ustavnom pravnoj komisiji od **60 dana** za dostavljanje izvještaja o Prijedlogu zakona o dopunama Zakona o parničnom postupku pred Sudom BiH.

Ad.10. Prijedlog zakona o volonterskim aktivnostima koje organiziraju udruženja i fondacije, crkve i vjerske zajednice i institucije Bosne i Hercegovine, predlagač: Vijeće ministara BiH, zakon broj: 01,02-02-1-1187/16, od 27.6.2016. (prvo čitanje)

Predsjedavajući je dao uvodne napomene i otvorio raspravu. Diskutirale su Nermina Kapetanović i Dušanka Majkić.

S 22 glasa „za“ (iz Federacije BiH 21, iz Republike Srpske jedan), 11 „protiv“ i četiri glasa „suzdržan“, Prijedlog zakona nije dobio potrebnu entitetsku većinu. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 21 glasom „za“, 11 „protiv“ (iz Republike Srpske) i pet glasova „suzdržan“, Prijedlog zakona o volonterskim aktivnostima koje organiziraju udruženja i fondacije, crkve i vjerske zajednice i institucije Bosne i Hercegovine **nije usvojen** u prvom čitanju.

Ad.11. Izvještaj o zaštiti ličnih podataka u Bosni i Hercegovini za 2015. godinu, podnosilac: Agencija za zaštitu ličnih podataka u Bosni i Hercegovini, akt broj: 01,02-37-1581/16, od 1.6.2016.

Predsjedavajući je dao uvodne napomene i otvorio raspravu. U raspravi su učestvovali: Sadik Ahmetović, Aleksandra Pandurević i Nikola Lovrinović.

Domu se obratio direktor Agencije za zaštitu ličnih podataka u BiH Petar Kovačević.

S 15 glasova „za“ (iz Federacije BiH devet, iz Republike Srpske šest), 11 „protiv“ i 11 glasova „suzdržan“, Izvještaj nije dobio potrebnu entitetsku većinu. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 12 glasova „za“, 15 „protiv“ (iz Federacije BiH deset, iz Republike Srpske pet) i deset glasova „suzdržan“, Izvještaj o zaštiti ličnih podataka u Bosni i Hercegovini za 2015. godinu **nije usvojen**.

Ad.12. Godišnji konsolidirani izvještaj o sistemu finansijskog upravljanja i kontrole za 2015. godinu, podnosilac: Ministarstvo finansija i tezora BiH, broj: 01,02,03-16-1-1478/16, od 18.5.2016.

Nakon uvodnih napomena, predsjedavajući je otvorio raspravu. Nije bilo prijavljenih.

Dom je, s 23 glasa „za“ (iz Federacije BiH 16, iz Republike Srpske sedam), četiri „protiv“ i deset glasova „suzdržan“, **usvojio** Godišnji konsolidirani izvještaj o sistemu finansijskog upravljanja i kontrole za 2015. godinu.

Ad.13. Informacija o stanju iseljeništva, podnosilac: Ministarstvo za ljudska prava i izbjeglice BiH, akt broj: 01,02-42-1590/16, od 2.6.2016.

Nakon uvodnih napomena, predsjedavajući je otvorio raspravu. U raspravi su učestvovali: Maja Gasal-Vražalica, Zaim Backović, Denis Bećirović, Nermina Kapetanović i Mirsad Mešić.

Domu se obratila ministrica za ljudska prava BiH, Semiha Borovac.

Dom je, s 32 glasa „za“ (iz Federacije BiH 25, iz Republike Srpske sedam), četiri „protiv“ i jednim glasom „suzdržan“, **primio k znanju** Informaciju Ministarstva za ljudska prava i izbjeglice BiH o stanju iseljeništva.

Ad.14. Informacija o provođenju Okvirnog sporazuma između Razvojne banke Vijeća Evrope i Bosne i Hercegovine u vezi s Regionalnim programom za stambeno zbrinjavanje s obrazloženjem, podnosilac: Ministarstvo za ljudska prava i izbjeglice BiH, akt broj: 01,02,03-21-1560/16, od 27.5.2016.

Predsjedavajući je dao uvodne napomene i otvorio raspravu. Nije bilo prijavljenih.

Nakon rasprave, predsjedavajući je Informaciju stavio na glasanje. Dom je, s 31 glasom „za“ (iz Federacije BiH 24, iz Republike Srpske sedam), jednim „protiv“ i pet glasova „suzdržan“, **primio k znanju** Informaciju o provođenju Okvirnog sporazuma između Razvojne banke Vijeća Evrope i Bosne i Hercegovine u vezi s Regionalnim programom za stambeno zbrinjavanje, s obrazloženjem.

Ad.15. Informacija o stanju i pojavama vršnjačkog nasilja i nasilja među djecom u Bosni i Hercegovini, podnosilac: Ministarstvo za ljudska prava i izbjeglice BiH, akt broj: 01-37-1743/16, od 22.6.2016. (realizacija poslaničke inicijative i zaključaka usvojenih na 24. sjednici, održanoj 3.2.2016.)

Predsjedavajući je dao uvodne napomene i otvorio raspravu. U raspravi su učestvovali: Monika Tomić, Maja Gasal-Vražalica, Nikola Lovrinović i Nermina Kapetanović.

Dom je, s 29 glasova „za“ (iz Federacije BiH 21, iz Republike Srpske osam), četiri „protiv i četiri glasa „suzdržan“, **primio k znanju** Informaciju o stanju i pojavama vršnjačkog nasilja i nasilja među djecom u Bosni i Hercegovini.

Ad.16. Informacija o raspodjeli i korištenju sredstava tekuće budžetske rezerve za period I. – XII. 2015. godine, podnosilac: Ministarstvo finansija i trezora BiH, akt broj: 01,02,03/03/14-16-1-1745/16, od 22.6.2016.

Predsjedavajući je dao uvodne napomene i otvorio raspravu. U raspravi su učestvovali: Dušanka Majkić, Aleksandra Pandurević, Amir Fazlić, Lazar Prodanović, Damir Bećirović, Jasmin Emrić, Mirsad Isaković, Salko Sokolović i Zaim Backović.

Dom je, s 19 glasova „za“ (iz Federacije BiH 13, iz Republike Srpske šest), 16 „protiv i dva glasa „suzdržan“, **primio k znanju** Informaciju o raspodjeli i korištenju sredstava tekuće budžetske rezerve za period I. – XII. 2015. godine.

Ad.17. Razmatranje poslaničke inicijative Denisa Bećirovića, podnesene 15.6.2016., koja glasi: „Zadužuje se Vijeće ministara BiH da, najkasnije u roku od 90 dana od dana usvajanja ove inicijative u Predstavničkom domu Parlamentarne skupštine BiH, sačini i u parlamentarnu proceduru dostavi izvještaj o primjeni Sporazuma o osnivanju javnih korporacija Bosne i Hercegovine (Aneks 9. Dejtonskog mirovnog sporazuma), s prijedlogom akcionog plana za primjenu navedenog sporazuma.“, akt broj: 01-50-1-1694/16

Nakon uvodnih napomena, otvorena je rasprava. Diskutirao je Denis Bećirović.

S 22 glasa „za“ (iz Federacije BiH 21, iz Republike Srpske jedan), 11 „protiv“ i četiri glasa „suzdržan“, inicijativa nije dobila potrebnu entitetsku većinu. Kolegij kao komisija odmah je obavio usaglašavanje. Nije bilo saglasnosti. U drugom krugu glasanja, s 22 glasa „za“, 11 „protiv“ (iz Republike Srpske) i četiri glasa „suzdržan“, poslanička inicijativa Denisa Bećirovića **nije usvojena**.

Ad.18. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama i dopunama Zakona o zabrani diskriminacije (predlažać: Vijeće ministara BiH, zakon broj: 01,02-02-1-341/15, od 4.3.2016.)

Nakon uvodnih napomena otvorena je rasprava. Nije bilo rasprave.

Predstavnički dom je, s 24 glasa „za“ (iz Federacije BiH 16, iz Republike Srpske osam), tri „protiv i deset glasova „suzdržan“, imenovao poslanike: Nerminu Kapetanović, Jovana Vukovljaka i Nikolu Lovrinovića u Zajedničku komisiju oba doma za postizanje identičnog teksta Zakona o izmjenama i dopunama Zakona o zabrani diskriminacije.

Ad.19. Imenovanje tri člana iz Predstavničkog doma u Zajedničku komisiju oba doma za postizanje identičnog teksta Zakona o izmjenama i dopunama Zakona o radnom vremenu, obaveznim odmorima mobilnih radnika i uređajima za

evidentiranje u drumskom prijevozu (predlagač: Vijeće ministara BiH, zakon broj: 01,02-02-1-34/15, od 1.3.2016.)

Nakon uvodnih napomena otvorena je rasprava. Nije bilo rasprave.

Predstavnički dom je, s 24 glasa „za“ (iz Federacije BiH 16, iz Republike Srpske osam), tri „protiv i deset glasova „suzdržan“, imenovao poslanike: Damira Arnauta, Đorđu Krčmara i Predraga Kožula u Zajedničku komisiju oba doma za postizanje identičnog teksta Zakona o izmjenama i dopunama Zakona o radnom vremenu, obaveznim odmorima mobilnih radnika i uređajima za evidentiranje u drumskom prijevozu.

Ad.20. Rasprava o pismu namjere Međunarodnom monetarnom fondu, predlagač tačke: poslanik Damir Bećirović, materijal broj: 01-50-1-1956/16, od 19.7.2016.

Nakon uvodnih napomena otvorena je rasprava. Diskutirao je Damir Bećirović, te je predložio zaključak koji glasi: *„Predstavnički dom PSBiH zahtijeva od Vijeća ministara BiH da, u skladu s čl. III. i IV. Ustava BiH, dostavi svaki međunarodni sporazum, ugovor i aranžman s međunarodnim finansijskim institucijama na ratifikaciju i odobravanje ili odbacivanje Parlamentarnoj skupštini BiH.“*

Zaključak je usvojen s 28 glasova „za“ (iz Federacije BiH 20, iz Republike Srpske osam), četiri „protiv i pet glasova „suzdržan“.

Ad.21. Zaključak o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine, predlagač: poslanica Aleksandra Pandurević, akt broj: 01-34-1-1959/16, od 19.7.2016.

Nakon uvodnih napomena otvorena je rasprava. U raspravi su učestvovali: Momčilo Novaković, Aleksandra Pandurević, Šemsudin Mehmedović, Saša Magazinović, Lazar Prodanović, Zaim Backović, Nermina Kapetanović, Denis Bećirović, Diana Zelenika, Amir Fazlić, Sadik Ahmetović i Damir Bećirović.

Predstavnički dom je, s 28 glasova „za“ (iz Federacije BiH 20, iz Republike Srpske osam), četiri „protiv“ i pet glasova „suzdržan“, usvojio Zaključak o formiranju Interresorne radne grupe za izradu Zakona o ispitivanju porijekla imovine zvaničnika u institucijama Bosne i Hercegovine.

Prije prelaska na sljedeću tačku dnevnog reda, predsjedavajući je dao na glasanje prijedlog da se objedini rasprava o tačkama 22. - 24., jer je riječ o davanju saglasnosti za ratifikaciju amandmana i sporazuma.

Dom je, s 36 glasova „za“ (iz Federacije BiH 24, iz Republike Srpske 12), bez glasova „protiv i jednim glasom „suzdržan“, usvojio ovaj prijedlog.

Ad.22.-24.

Predsjedavajući je dao uvodne napomene i otvorio raspravu. Diskutirao je Nikola Lovrinović.

Dom je, s 33 glasa „za“ (iz Federacije BiH 22, iz Republike Srpske 11), bez glasova „protiv“ i četiri glasa „suzdržan“, **dao saglasnost** za ratifikaciju:

- Sporazuma o zajmu između Bosne i Hercegovine i OPEC-ovog Fonda za međunarodni razvoj (OFID) – Projekat razvoja ruralnog preduzetništva,
- Ugovora o grantu (Projekat vodosnabdijevanja Gradačac) između Bosne i Hercegovine i JP „Komunalac“ d.d. Gradačac i Evropske banke za obnovu i razvoj i
- Sporazuma o grantu između Razvojne banke Vijeća Evrope i Bosne i Hercegovine u vezi s Regionalnim stambenim programom – BiH4 (2015.), akt broj: 01,02-05-2-1826/16, od 4.7.2016.

Sjednica je završena u 18,45 sati.

Sastavni dio Zapisnika je transkript 33. sjednice Predstavničkog doma.

SEKRETAR
PREDSTAVNIČKOG DOMA
Marin Vukoja

PREDSJEDAVAJUĆI
PREDSTAVNIČKOG DOMA
Mladen Bosić